

Ancje l'ospedâl di Udin inte rêt par promovi la marilenghe

Il progjet promovût de ARLeF par sensibilizâ i neogenitôrs sui vantaçs dal plurilinguism al rive ancje inte capitâl dal Friûl

Il progjet "Cressi cun plui lenghis", promovût de ARLeF - Agenzie Regjonâl pe Lenghe Furlane, al è stât inviât tes setemanis passadis tal D.A.I. Materni Infantîl de Aziende sanitarie universitarie Friûl Centrâl (Asufc) e al è daûr a vê rispuestis impuartantis. La iniziative, za in vore in chei altris presidis de Asufc in plui che a San Vît dal Tiliment (Asfo), e je rivade infin ancje inte capitâl dal Friûl dopo dal stop sfuarçât causât de emergjence pandemiche. L'obietf dal progjet al è di informâ e di sensibilizâ i neogenitôrs sui vantaçs dal plurilinguism fin de prime infanzie.

«La impuartance di doprâ ancje la lenghe dal teritori intes structuris dal Ospedâl de capitâl furlane - al sclaris il Diretôr Gjenerâl de ASU FC, dot. Denis Caporale - e je evidente e i vantaçs pai frutins a pene nassûts a son sot dal voli di ducj: o scomencin cun plasê ancje cheste colaborazion che e à intal plurilinguism la sô particularitât. Lis gnovis gjenerazions no àn di pierdi i leams cu lis tradizions dal lûc di nassite, ma anzit a àn di conservâ e puartâ indenant chel che une tiere tant che il Friûl e pues ufrî ancje dal pont di viste linguistic».

«Al è un progjet che i tignin une vore e che par metilu adun a son stâts cjavâts dentri esperts scientifics di caratar internazionâl - al à sclarît il president de ARLeF, Eros Cisilino -. Si caraterize, di fat, par cualitât e impuartance, cemût che al è testimoniat dai preseaments vûts no dome sul teritori, ma ancje a nivel european. Cun cheste iniziative si promôf la culture dal plurilinguism e la difusion de marilenghe fra lis gnovis gjenerazions. Si lu fâs cuntune informazion smirade aes fameis, judantlis intal mantigniment de lenghe fin de nassite. Favorî il plurilinguism za inte fase 0-3 agns e je di fat une azion necessarie sedi par garantî un avignî ae lenghe furlane, che par dâ a ducj i frutins a pene nassûts une oportunitât plui grande di disvilup, ancje neurolinguistic, cemût che e sclaris la science. Cence dismenteâ che, cui che al è bilengâl fin de infanzie, al impararà miôr ancje lis lenghis forestis».

La prime fase di "Cressi cun plui lenghis" e à cjavât dentri il personâl dal D.A.I. Materni Infantîl, che al à frequentât apontaments formatîfs specificis tal mê di Avost stât. Lis buinis praticis a son stadis spiegadis de dotore Claudia logna Prat, che e je stade a dilunc

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<

coordinadore dal proget tal ospedâl di Tisane. I sanitaris duncje a àn scomençât a informâ i gjenitôrs consegnantjur, prime che a tornin a cjase cul lôr frutin a pene nassût, la valisute "Puarte a cjase il furlan" che e à dentri une vuide là che si sclarissin i vantaçs dal ûs di plui lenghis cui fruts (un manuâl bilengâl cui conseis dai esperts e lis oportunitâts pai fruts e lis lôr fameis intal ûs di diviersis lenghis, no dome di chê furlane), e altri materiâl di zûc e promoziônâl, tant che dvd di animazion e libris pe infanzie. Intal 2020, cundut dai limits imponûts de pandemie, a 'nt son stadis consegnadis 1555 in dut il Friûl. Intal 2021 "Cressi cun plui lenghis" al è tornât a partî invezit ad implen.

Udin, ai 9 di Dicembar dal 2021

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / **e-mail: arlef@caltpr.it**

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<